



Fantasy am Rhy

E Määrli vo Basel

D Fantasy aagreggt het me friener mit Määrli.
Dasch hit out! Jetz sin Starwar, Comics und Video dr Hit.
Statt Bambi, Mickey Mouse und Teddybäärli
wänn Kids jetz Roboter und e Liechtschwäärt dermit.

Si wänn au Wältruumklamotte und Manga-Figgyrli,
und zem das Zyyg millionefach z verkaufe
git s jetz Fantasy-Mässe – au z Basel nadyyrilig –
wo au Gstalte so verkladet ummelaufe.

Dr **Obi Wan Kenobi**, dä Ober-Jedi Babbe,
wartet uff eme Myyrli unter em e Baum.
Luegt ganz mied uss syynere Kapuze-Kappe,
denn pennt er yy und het e Draum.

D Prinzässin Leia, heert er e Stimm,
die bruuchi Hilf, me miess si go befreye,
si sig gfangen uff em e Schiff, und das sig schlimm,
wil si fiirchterlig um Hilf däät schreie.

Jetz muess i schnäll e Kampfdrupp zämmebaue
mit acht stargge Manne, kaine Niete,
zem das gfangne Mamsell uusezhaue
denn das loss i mer nit lo biete.

So ziet er loos und scho am näggschten Egge
stoot e Gestalt mit Heerner, Bart und Schwäärt.
I bi dr **schregglic Hägar**, muesch nit verschregge,
in Sache Schiffkampf bin ich e sichre Wäärt.

Denn gseen si e Muskelbrotz vor eme Zält.
"I bi dr **unglaublich Hulk**. I ka zwoor au lieb syy,
doch wird i bees bin i grien und dr stärggscht uff dr Wält".
"Di kenne mer bruuche, wenn d wotsch bisch derby".

E Gump und e Sprung, do stoot vor ne e Pirat.
"Gestatte **Jack Sparrow**, Maischter im Improvisiere,
denn ich ha immer e Driggli barat,
drum will i s mit Eich emool probiere".

Uss em e Blakaat stygt do pletzlich e gspässigi Gestalt,
dr **Son Goku**, dr mächtigschti Kämpfer uff Aerde.
"I beschitz d Menschhait vo allem Beese und Gwalt,
doch bin i guet druff, ka s mit eich luschtig wärde".

In ere riisige Rischtig stoot do ain am en Egge
mit glainem Kopf und eme Mega Schwäärt.
"I bi dr **Arthas** und muess mi vor kaim versteppe.
Nämmed mi mit, i schweer i bis wärt".

En orangi Gnungele - mit wirren Auge - kunnt do ins Bild.
"Luut Drummler kan i bis de nimme kasch loose,
nur kämpfe kan i nit" fuchtlet dr **Animal** wild,
"doch i ka – doch i ka eich dr Marschtaggt bloose".

So ziet si wyter die illusteri Druppe.
Pletzlich e Qualm und e Knall dass es roggt.
Druss duet sich dr **Harry Potter** entpuppe:
"I kumm mit, näbscht Kämpfe isch au Zaubere gfrogt".

Als Achte kunnt jetz, es isch zem Schreie,
dr **Worf** dur Strooss, als Einzelgänger.
Dä het si Hirni ganz im Freie
so blyybt er cool als Befäälsempfänger.

So steen die Manne um dr Obi umme.
Dr Animal rieht „e Schwäärt, e Schwäärt i ha no kains“.
Dr Startbefäääl fäält jetze numme,
do schloot vom e Kirchduurm e Glogge Ains.

Das grad wo si hän welle zem Aagriff pfyffe,
do wacht dr Obi uff, zrugg ins richtige Lääbe.
Vom Myyrli am Staineberg, no verdatteret und ergriffe,
seet är vor sich dr Waage vo de Kloscherräbe.

S isch scho e Schiff, halt e Ruumschiff zwor,
e poppige Waage mit eme Dach.
Und deert stoot, mit eme Schnägg in de Hoor,
d **Prinzässin Leia** als Waagewach.

Nervees duet si deert ummehipfe
und rieht nomool: „Obi, bitte hilf mer doch!
I ka dä Rääplisagg nit sälber lipfe,
i glaub dä Kaib dä het e Loch“.

So goot das Määrli z Änd. Die Zää vo dääre Clique
steen uff em Waage, denn d Fasnacht goot gly los
mit Zeedel verdaile und Orange schigge
uff em Cortège, fir die drey Dääg uff dr Strooss.

Bsuech is au uff www.kloscherraebe.ch

D Ladäärne-Uusstellig uff em Minschterplatz und
D Waage- und Reggwisyte-Uusstellig bi dr Kasäärne
sin vom Määntig znacht bis am Mittwuch demoorge!
Deert und an de 3 Verkaufsständ (CINS) in dr Stadt ka men au alli
Zeedel und Schnitzelbängg, d Blaggette und dr Rädäbäng kaufe.

D Zeedellääsete isch am Sunntig no dr Fasnacht 2016 am 21. Hornig
vom Fimfi bis am Siibeni zoobe im Käller vo dr Baseldytsche Biini
(im Lohnhof). Dr Yytritt isch vergäabe D Foyer-Bar isch vom Vieri
ewäg offe.